

Tabell 2-fk

Innbyggjartilskot til fylkeskommunane 2025 (kap. 572, post 60)

Innbyggjartilskotet blir i utgangspunktet fordelt mellom fylkeskommunane med eit likt beløp per innbyggjar (etter at saker med ei særskild fordeling er trekte ut, jf. kolonne 11 i tabell C-fk). Deretter blir rammetilskotet fordelt om mellom fylkeskommunane gjennom utgiftsutjamninga, korreksjonsordninga for elevar i statlege og private skular og overgangsordninga.

Inntektsutjamninga for 2025 inngår òg i post 60, men er ikkje med i Grønt hefte fordi ho blir berekna etter kvart som skatteinngangen ligg føre. Samla sum på post 60 for den einskilde fylkeskommune vil difor ikkje vere klar før i februar 2026. Utgiftsutjamninga og inntektsutjamninga er reine omfordelingar mellom fylkeskommunane.

Det blir kvart år gjort korrigeringar i rammetilskotet på grunn av endringar i oppgåvefordelinga mellom forvaltingsnivå, nye oppgåver, regelendringar, innlemming av øymerkte tilskot o.a. Korrigeringar for 2025 er viste i innleiinga og er omtala nærare i Prop. 1 S (2024–2025) for Kommunal- og distriktsdepartementet.

Innbyggjartilskotet, inkludert utgiftsutjamninga, blir berekna ut ifrå innbyggjartalet per 1. juli 2024. Inntektsutjamninga blir berekna ut ifrå innbyggjartalet per 1. januar 2025.

Kolonne 1 – Innbyggjartilskot før omfordeling

Kolonne 1 viser løyving på kap. 572, post 60 før omfordeling, etter at saker med ei særskild fordeling (tabell C-fk) er trekte frå. Løyvinga på kap. 572, post 60 er i alt 51,086 mrd. kroner. Av dette blir om lag 5,5 mrd. kroner gjeve med ei særskild fordeling. Innbyggjartilskotet er i utgangspunktet fordelt med eit likt beløp per innbyggjar per 1. juli 2024 til alle fylkeskommunane. For 2025 er innbyggjartilskotet før omfordeling 8 185 kroner per innbyggjar (ekskl. saker med særskild fordeling i tabell C).

Kolonne 2 – Utgiftsutjamning

Kolonne 2 viser omfordelinga i utgiftsutjamninga og korreksjonsordninga for elevar i statlege og private skular. Utgiftsutjamninga og korreksjonsordninga er nærare dokumentert i tabell A-fk.

Kolonne 3 – Saker med særskild fordeling

Kolonne 3 viser summen av dei 10 sakene med ei særskild fordeling i 2025. Fordelinga som kjem fram i kolonnen er nærare dokumentert i tabell C-fk.

Kolonne 4 – Overgangsordning, nytt inntektssystem 2024

Kolonne 4 viser overgangsordninga for innføring av nytt inntektssystem frå og med 2024. Dei samla fordelingsverknadane ved nytt inntektssystem i 2024, medrekna effekten av kompensasjonsordninga (tabell C-fk, kolonne 10), vert gradvis fasa inn gjennom ei overgangsordning på fire år. Fylkeskommunar som fekk redusert rammetilskot som følge av

endringane i 2024 får att 2/4 av reduksjonen gjennom overgangsordninga i 2025. Fylkeskommunar som får auka rammetilskot som følge av endringane får redusert auken med 2/4 i 2025.

Dei samla fordelingsverknadane av nytt inntektssystem er korrigert for feil i kriteriet vedlikehaldsbehov for fylkesveg i 2024, jf. omtale i *Kommuneproposisjonen 2025* (Prop. 102 S (2023-2024)). Sjå tabell B-fk for nærare dokumentasjon av overgangsordninga.

Kolonne 5 – Innbyggjartilskot med utgiftsutjamning m.m.

Kolonne 5 viser samla løyving på kap. 572, post 60 i 2025, i alt 51,086 mrd. kroner. Kolonnen viser innbyggjartilskotet, medrekna utgiftsutjamninga, korreksjonsordninga for statlege og private skular, sakene med særskild fordeling og overgangsordninga. Kolonnen er summen av kolonnane 1 til 4. Kolonnen er òg vist i tabell 1-fk, kolonne 1.